

四庫全書

集部

欽定四庫全書

集部

李太白集分類補註卷二十五至

詳校官侍郎

臣謝墉

檢討臣何思鈞覆勘

總校官編修臣王燕緒

校對官編修臣馬啟泰

謄錄監生臣許祖悅

欽定四庫全書

李太白集分類補註卷二十五

宋 楊齊賢 集註

元 蕭士贇 補註

題

一十二首

題隨州紫陽先生壁

神農好長生風俗久已成
復聞紫陽客卑署丹臺名
喘息食妙氣步虛吟真聲
道與古仙合心將元化并
樓疑

出蓬海鶴似飛玉京松雪牕外曉池水階下明忽耽笙

歌樂頗失軒冕情終願惠金液提携凌太清

齊賢曰抱朴子曰金

液太一所服而仙者太清天也蓬海玉京山見前

題元丹丘山居

故人棲東山自愛丘壑美青春卧空林白日猶不起松
風清襟袖石潭洗心耳羨君無紛喧高枕碧霞裏

題元丹丘穎陽山居

并序

丹丘家于穎陽新卜別業其地北倚馬嶺連峯高丘

南瞻鹿臺極目汝海雲巖映鬱有佳致焉白從之遊
故有此作

仙遊渡潁水訪隱同元君忽遺蒼生望獨與洪崖羣卜
地初晦跡興言且成文却顧北山斷前瞻南嶺分遙通
汝海月不隔嵩丘雲之子合逸趣而我欽清芬舉跡倚

松石談笑迷朝曛益願狎青鳥拂衣棲江濱

齊賢曰潁水洪崖見

前

題瓜州新河餞族叔舍人賁

齊公鑿新河萬古流不絕豐功利生人天地同朽滅兩
橋對雙閣芳樹有行列愛此如甘棠誰云敢攀折美闕
倚此固天險自茲設海水落斗門湖平見沙汭我行送
季父弭棹徒流悅楊花滿江來疑是龍山雪惜此花下

興愴與山陽別瞻望清路塵歸來空寂滅

士璣曰毛詩
甘棠美召伯

也召伯之教明於南國蔽芾
甘棠勿剪勿伐召伯所茇

洗脚亭

白道向姑熟洪亭臨道傍前有昔時井下有五丈牀樵

女洗素足行人歇金裝西望白鷺洲蘆花似朝霜送君

此時去回首淚成行

一作雙

勞勞亭

天下傷心處勞勞送客亭春風知別苦不遣柳條青

齊賢

曰輿地志秣陵縣新亭隴有勞勞樓宋改為臨滄觀行人分別之所

題金陵王處士水亭

此亭齊朝南苑又晉陸機故宅

王子耽玄言賢豪多在門好鵝尋道士愛竹嘯名園樹

色老

一作秀

荒苑池光蕩華軒此堂見明月更憶陸平原

掃地青玉簫為余置金樽醉罷

一作後

欲歸去花枝宿鳥

喧何時復來此再得洗鴛煩

齊賢曰好鵝愛竹事見前平原陸機也事亦見前

題嵩山逸人元丹丘山居

并序

白久在廬霍元公近遊嵩山故交深情出處無間出
信頻及許為主人欣然適會本意當冀長往不返欲
便舉家就之魚書其遊因有此贈

家本紫雲山道風未淪落沉懷丹丘志冲賞歸寂寞竭
來遊閩荒捫涉窮禹鑿寅緣泛潮海偃蹇陟廬霍憑雷

躡天牕弄影憩霞閣且欣登眺美頗愜隱淪諾

齊賢曰唐閩州

長樂郡開元十三年更名福州治閩縣即西漢閩粵王閩中郡之地頻海荒服故曰閩荒廬山隸江州霍山即舒之鎮桓子新論天下神人五二曰隱淪士臧曰水經砥柱山禹鑿以通河

三山曠幽期四

岳聊所託故人契嵩頽高義炳丹牘滅跡遺紛囂終言

本峯壑自矜林湍好不羨朝市樂偶與真意并頃覺世

情薄爾能折芳桂吾亦採蘭若拙妻好乘鸞嬌女愛飛

鶴提携訪神仙從此鍊金藥

齊賢曰三山三神山也四岳恒華泰衡也

題江夏脩靜寺

此寺是李北海舊宅

我家北海宅作寺南江濱空庭無玉樹高殿坐幽人書

帶留青草琴堂

一作臺

幕素塵平生種桃李寂滅不成春

齊賢曰李邕為北海太守天寶中為吉溫所陷而殺之於郡代宗贈秘書監國史異纂雲陽界多漢離宮故地有樹似槐而細葉士人謂之玉樹三齊記鄭康成常居南山中教授山下草如薤葉長尺許時人名為書帶草

改九子山為九華山聯句

并序

青陽縣南有九子山山高數千丈上有九峯如蓮花
按圖徵名無所依據太史公南遊略而不書事絕古
老之口復闕名賢之紀雖靈仙往復而賦詠罕聞予

乃削其舊號加以九華之目時訪道江漢憩于夏侯
迴之堂開簷岸幘坐眺松雪因與二三子聯句傳之
將來

妙有分二氣靈山開九華

李白

層標迢遞日牛壁明朝霞

高積雪曜陰壑飛流歆陽崖

韋權與曜一作權

青熒玉樹色縹

緲羽人家

李白士斌曰老子云道生一王弼注曰一數之始而物之極也謂之為妙有者欲言有不

見其形則非有故謂之妙欲言其無則物由以生則非無故謂之有也斯乃無中之有謂之妙有也銑曰青熒

光也

題宛溪館

吾憐宛溪好百尺照心明

一作久照
心益明

可謝新安水千尋

見底清白沙留月色綠竹助秋聲却笑嚴湍上于今獨

擅名

齊賢曰宛陵隸
宣州嚴湍見前

題東谿公幽居

杜陵賢人清且廉東谿卜築歲將淹宅近青山同謝眺

門垂碧柳似陶潛好鳥迎春歌後院飛花送酒舞前簷

客到但知留一醉盤中祇有水晶鹽

齊賢曰太白傳曰
晚好黃老渡牛渚

歲至姑熟悅謝家青山欲居焉故云宅近青山
陶潛門前有五柳因作五柳先生傳以自況

雜詠一十六首

嘲魯儒

魯叟談五經白髮死章句問以經濟策范如墜煙霧足
著遠遊履首戴方山中緩步從直道未行先起塵秦家
丞相府不重褒衣人君非叔孫通與我本殊倫時事且

未達歸耕汶水濱

齊賢曰後漢志方山冠似進賢以五
經穀為之秦紀丞相斯請史官非秦

記皆燒之非博士官所職天下敢有藏詩書百家語者
悉詣守尉雜燒之士贗曰叟長老之通稱叔孫通起朝

儀徵魯諸生三十餘人魯有兩生不肯行通笑曰若真鄙儒不通時變

懼讒

二桃殺三士詎假劍如霜衆女妬蛾眉雙花競春芳魏

姝信鄭裒掩袂對懷王一惑巧言子朱顏成死

一作相傷

行將泣團扇戚戚愁人腸

齊賢曰戰國策魏王遺楚王美人楚王悅之夫人鄭裒知

王之悅新人也甚愛新人衣服玩好擇其所喜而為之愛之甚於王王曰婦人之所以事夫者色也而妬者其情也今鄭氏知寡人之悅新人其愛之甚於寡人此忠臣之所以事君也鄭氏知王以己為不如也因謂新人曰王愛子美矣雖然惡子之鼻子見王則必掩于鼻新人見王因掩其鼻王謂鄭氏曰何也鄭曰其似聞君王

之矣也王曰悍哉令劉之無使逆命成帝初即位班婕妤選入宮為婕妤後幸趙飛燕婕妤失寵擬古怨歌行曰裁成合歡扇團圓似明月棄捐篋笥中恩情中道絕士贇曰二桃殺三士見前卷

觀獵

太守耀清威乘間弄晚暉江沙橫獵騎山火遶行圍箭逐雲鴻落鷹隨月兔飛不知白日暮歡賞夜方歸

觀胡人吹笛

胡人吹玉笛一半是秦聲十月吳山曉梅花落敬亭愁聞出塞曲淚滿逐臣纓却望長安道空懷戀主情

齊賢曰李

斯云擊甕叩缶彈箏搏髀而呼烏鳥快耳者真秦聲也
敬亭山見前落梅花羌笛曲也張博望傳其法於西涼
得摩訶兜勒一曲李延年因之思造新聲二十八解乘
與以為武樂嘗給邊將魏晉以後二十八解不存所用
者唯黃鶴顧頭水出關入關出塞入塞折楊柳黃覃子
赤之楊望行人十四曲也士贇曰太白放逐之餘眷戀
宗國之意隨寓而發觀此詩末三句概可見矣

軍行

騶馬新夸

一作誇

白玉鞍戰罷沙場月色寒城頭鐵鼓聲

猶震匣裏金刀血未乾

齊賢曰毛詩註赤身黑鬣曰騶

從軍行

百戰沙場碎鐵衣城南已合數重圍突營射殺呼延將

獨領殘兵千騎歸

齊賢曰薛收曰匈奴署各種單于有王號者十六等左右賢王四姓曰呼

延氏十氏蘭氏喬氏呼延號曰逐世為輔相

平虜將軍妻

平虜將軍婦入門二十年君心自不悅妾寵豈能專出
解牀前帳行吟道上篇古人不唾井莫忘昔纏綿

春夜洛城聞笛

誰家玉笛暗飛聲散入春風滿洛城此夜曲中聞折柳

何人不起故園情

齊賢曰折楊柳曲名

嵩山採菖蒲者

神仙多苦貌雙耳下垂肩嵩嶽逢漢武疑是九嶷仙我來採菖蒲服食可延年言終忽不見滅影入雲煙喻帝

竟莫悟終歸茂陵田

齊賢曰此篇是詠仙人王興詩語乃隱括其傳中事神仙傳王興者

城陽人居壺谷中不知書無學道意漢武上嵩山登大愚石起道宮使董仲舒東方朔徐樂思神至夜半忽有仙人長二丈耳出頭巔下至肩漢武禮而問之仙人曰吾九嶷之人間中嶽石上菖蒲一寸九節可以服之長生故來採耳忽失所在帝顧侍臣曰彼非復學道服食者必中嶽之神以喻朕耳為之採菖蒲服之經三年帝

覺悶而不快遂止時從官多服然莫能持久唯王興聞
仙人告武帝服乃採服之不息遂得長生武帝葬茂陵

金陵聽韓侍御吹笛

韓公吹玉笛，倜儻流英音。風吹繞鍾山，萬壑皆龍吟。王

子停鳳管，師襄掩瑤琴。餘韻度江去，天涯安可尋。

齊賢曰：長

笛賦：龍吟水中，不見已截竹吹之聲，相似王子晉吹笙作鳳鳴。士贇曰：家語：孔子學琴於師襄，子襄子曰：吾雖擊磬以為宮，然能於琴。

流夜郎聞酺不預

北闕聖人歌，太康南冠君。子竄遐荒，漢酺聞奏鈞天樂。

願得風吹到夜郎

齊賢曰光武紀大酺註漢律三人以上羣飲罰金四兩今賜得令聚會飲

五日酺布也士贊曰鈞

天廣樂南冠君子見前

放後遇恩不霑

天作雲與雷霈然德澤開東風日本至白雉越裳來獨

棄長沙國三年未許回何時入宣室更問洛陽才

齊賢曰易

雲雷屯君子以經綸周公相成王越裳氏重譯獻白雉

史賈誼為長沙王太傅歲餘徵見文帝受釐坐宣室因

感鬼神事而

問鬼神之本

宣城見杜鵑花

蜀國曾聞子規鳥宣城還見杜鵑花一叫一迴腸一斷

三春三月憶三巴

齊賢曰成都記杜宇自天而降稱望帝好稼穡勸人務農至今蜀人將農

必先祠杜宇又望帝死其魂化為鳥名曰杜鵑亦曰子規時適三月子規鳥鳴故蜀人悲子規鳥潤州鶴林寺杜鵑花高丈餘今江南處處有之俗名映山紅

白田馬上聞鶯

黃鸝啄紫椹五月鳴桑枝我行不記日誤作陽春時蠶

老客未歸白田已綠絲驅馬又前去捫心空自悲

悲一作嗤

三五七言

秋風清秋月明落葉聚還散寒鴉棲復驚相思相見知

何日此時此夜難為情

齊賢曰古無此體自太白始

雜詩

白日與明月晝夜尚

一作常

不閒況爾悠悠人安得久世

間傳聞海水上乃有蓬萊山玉樹生綠葉靈山每登攀

一食駐玄髮再食留紅顏吾欲從此去去之無時還

齊賢

曰蓬萊玉樹見前卷

閨情

五十五首

寄遠十二首

三鳥別王母銜書來見過斷腸若剪絃其如愁思何遙
知玉牕裏纖手弄雲和奏曲有深意青松交女蘿寫水
山中井同泉豈殊波秦心與楚恨皎皎為誰多

齊賢曰
三青鳥

王母使也事見前樂書曰自古善琴者八十餘家一十八
樣究之雅度不過伏羲大舜夫子靈闕雲得五等而已

其二

青樓何所在乃在碧雲中寶鏡掛秋水

一作月

羅衣輕春

風新粧坐落日悵望金

一作錦

屏空念此

一作剪綵

送短書願

因雙飛鴻

其三

本作一行書慙勤道相憶一行復一行滿紙情何極

臺有黃鶴為報青樓人朱顏凋落盡白髮一何新自知

未應還離居

一作君

經三春桃李今若為當牕發光彩莫

使香風飄留與紅芳待

齊賢曰瑤臺青樓見前

其四

玉筍落春鏡坐愁湖陽水聞與陰麗華風煙接鄰里青
春已復過白日忽相催但恐荷花晚令人意已摧相思

不惜夢日夜向陽臺

齊賢曰玉筍淚也湖陽後漢南陽郡光武陰皇后諱麗華南陽新野

人初光武適新野聞后美心悅之嘆曰娶妻當得陰麗華巫山陽臺事見前

其五

遠憶巫山陽花明渌江暖躊躇未得往淚向南雲滿春
風復無情吹我夢魂斷不見眼中人天長音信短

其六

陽臺隔楚水春草生黃河

一作陰雲隔楚水轉蓬落渭河

相思無日夜

浩蕩若流波流波向海去欲見終無因

一作定饒珠江濱

遙將

一點淚遠寄如花人

其七

妾在春陵東君居漢江島一日望花光往來成白道

一作

日日采蘼蕪上山成白道

一為雲雨別此地生秋草秋草秋蛾飛相

思愁落暉何由一相見滅燭解羅衣

一本暉下云昔時攜手去今時流淚

歸遙知不得意玉筍點羅衣齊賢曰春陵漢江見前

其八

憶昨東園桃李紅，碧枝與君此時初別離。
金瓶落井無消息，令人行歎復坐思。
坐思行歎成楚越，春風玉顏畏銷歇。
碧牕紛紛下落花，青樓寂寂空明月。
兩不見，但相思。空留錦字表心素，至今緘愁不忍窺。

其九

長短春草綠，綠階如有情。
卷施心獨苦，抽却死還生。
覩物知妾意，希君種後庭。
閒時當採掇，念此莫相輕。

齊賢曰：卷

施即本草藁
耳注曰蒼耳

其十

魯縞如玉霜筆題月氏書寄書白鸚鵡西海慰離居行
數雖不多字字有委曲天未如見之開緘淚相續淚盡

恨轉深千里同此心相思千萬里一書直千金

一作云
千里若

在眼萬里若在心齊賢曰師古曰縞素
也曲阜善作尤為輕細月氏西域國名

其十一

美人在時花滿堂美人去後餘空牀牀中繡被卷

一作
更不

卷

不寢至今三載聞餘香

一作猶聞香

香亦竟不減人亦竟

不來相思黃葉落白露濕青苔

士贊曰古詩空牀難獨守

其十二

愛君芙蓉嬋娟之艷色色可餐兮難再得憐君冰玉清
迴之明心情不極兮意已深朝共琅玕之綺食夜同鴛
鴦之錦衾恩情婉孌忽為別使人莫錯亂愁心亂愁心
涕如雪寒燈厭夢魂欲絕覺來相思生白髮盈盈漢水
若可越可惜凌波步羅襪美人美人兮歸去來莫作朝

雲暮雨兮飛陽臺

齊賢曰琅玕玉也士贇曰陸機詩註曰婉孌存思貌

長信宮

月皎昭陽殿霜清長信宮天行乘玉輦飛燕與君同更

有歡娛處

一作別有留情處

承恩樂未窮誰憐團扇妾獨坐怨

秋風

齊賢曰漢書孝成趙皇后弟見幸為昭儀居昭陽宮梁皇后傳註漢儀帝祖母稱長信宮飛燕事見

前

長門怨二首

天迴北斗挂西樓金屋無人螢火流月光欲到長門殿

別作深宮一段愁

士贊曰詩箋云螢火家無人則然令
人感思室中久無人故有此物是不

足畏乃可
以為憂

其二

桂殿長愁不記春黃金四屋起秋塵夜懸明鏡青天上

獨照長門宮裏人

士贊曰此詩皆渠括漢武陳皇后事
以比元宗皇后其意微而婉矣事見

前卷
註

春怨

白馬金羈遼海東羅帷綉被卧春風落月低軒窺燭盡

飛花入戶笑牀空

代贈遠

妾本洛陽人狂夫幽燕客
渴飲易水波由來多感激
胡馬西北馳香駿搖綠絲
鳴鞭從此去逐虜蕩邊陲
昔去有好言不言久離別
燕支多美女走馬輕風雪
見此不記人恩情雲雨絕
啼流玉筍盡坐恨金閨切
織錦作短書腸隨回紋結
相思欲有寄恐君不見察
焚之揚其灰手跡自此滅

齊賢曰實滔為符堅秦州刺史被徙流沙妻蘇若蘭織錦回文旋圖詩以贈滔宛轉

循環讀之詞甚悽
惋凡八百四十字

陌上贈美人

一云小放歌行一首
在第三此是第二篇

駿馬驕行踏落花
垂鞭直拂五雲車
美人一笑褰珠箔
遙指紅樓是妾家

閨情

流水去絕國
浮雲辭故關
水或戀前浦
雲猶歸舊山
恨君流沙去
棄妾漁陽間
玉筍夜垂流
雙雙落朱顏
黃鳥坐相悲
綠楊誰更攀
織錦心草草
挑燈淚斑斑
窺鏡不

自識況乃狂夫還

士贊曰此篇是詠竇滔妻蘇氏若蘭錦織作回文詩寄夫事詳見前詩

代別情人

清水本不動桃花發岸傍桃花弄水色波蕩搖春光我
悅子容艷子傾我文章風吹綠琴去曲度紫鴛鴦昔作
一水魚今成兩枝鳥哀哀長雞鳴夜夜達五曉起折相
思樹歸贈知寸心覆水不可收行雲難重尋天涯有度

鳥莫絕瑤華音

齊賢曰吳郡賦南榴之木相思樹也

代秋情

幾日相別離門前生魯葵寒蟬聒梧桐日夕長鳴悲白

露濕螢火清霜凌兔絲空掩紫羅袂

一作空閨掩羅袂

長啼無

盡時

齊賢曰魯自生稻兔葵生水中爾雅兔葵頭似葵小葉狀似黎有毛抱朴子曰兔絲草下有伏兔之

根無此兔則絲不生於上

對酒

蒲萄酒金巨

音頗

羅吳姬十五細馬馱青黛畫眉紅錦靴

道字不正嬌唱歌玳瑁筵中懷裏醉芙蓉帳裏

一作底

柰

君何

怨情

新人如花雖可寵故人似玉由來重花性飄揚不自持
玉心皎潔終不移故人昔新今尚故還見新人有故時
請看陳后黃金屋寂寂珠簾生網絲

齊賢曰金屋貯
阿嬌事見前

湖邊採蓮婦

小姑織白紵未解將人語大嫂採芙蓉溪湖千萬重長
兄行不在莫使外人逢願學秋胡婦貞心比古松

齊賢
曰爾

雅女子謂兄之妻為嫂
士贊曰秋胡事見前

怨情

美人捲珠簾深坐顰蛾眉但見淚痕濕不知心恨誰

代寄情楚詞體

君不來兮徒蓄怨積思而孤吟雲陽一去已遠隔巫山
綠水之沉沉留餘香兮染綉被夜欲寢兮愁人心朝馳
余馬於青樓悅若空而夷猶浮雲深兮不得語却惆悵
而懷憂使青鳥兮銜書恨獨宿兮傷離居何無情而雨
絕夢雖往而交疎橫流涕而長嗟折芳洲之瑤華送飛

鳥以極目怨夕陽之西斜願為連根同死之秋草不作

飛空之落花

齊賢曰巫山青鳥見前

學古思邊

銜悲上隴首腸斷不見君流水若有情幽哀從此分蒼

茫愁邊色惆悵落日曛山外接遠天天際復有雲白鴈

從中來飛鳴苦難聞足繫一書札寄言難離羣離羣心

斷絕十見花成雪胡地無春暉征人行不歸相思杳如

夢珠淚濕羅衣

齊賢曰蘇武傳天子射上林得雁足有繫帛書甌水事見前

思邊 一作春怨

去年何時君別妾南園綠草飛蝴蝶今歲何時妾憶君
西山白雪暗秦雲玉關去此三千里欲寄音書那可聞

齊賢曰玉

闕事見前

口號吳王美人半醉

風動荷花水殿香姑蘇臺上見吳王西施醉舞嬌無力

笑倚東牕白玉牀

齊賢曰全篇事見前卷

折荷有贈

此與擬古詩內第十一首數字不同故兩存之

涉江翫秋水愛此紅蕖鮮攀荷弄其珠蕩漾不成圓佳
人綵雲裏欲贈隔遠天相思無因見惆悵涼風前

代美人愁鏡二首

明明金鵲鏡了了玉臺前拂拭交冰月光輝何清圓紅

顏老昨日白髮多去年鉛粉坐相誤照來空悽然

齊賢曰神

異經有夫婦相別破鏡人各執半以為信其妻與人
通鏡化為鵲飛至夫前夫乃知之後人因鑄鏡為鵲

其二

美人贈此盤龍之寶鏡燭我金縷之羅衣時將紅袖拂

明月為惜普照之餘輝影中金鵲飛不滅臺下青鸞思

獨絕藁砧一別若箭弦去有日來無年狂風吹却妾心

斷玉筍并墮菱花前

齊賢曰唐記云天寶三載五月初五日揚州進水心鏡一面縱橫九

寸青瑩耀日背有盤龍長三尺四寸五分勢如生動元宗異之進鏡官揚州參軍李才泰曰鑄鏡時有老人自稱曰龍名護有小童名玄冥至謂鏡匠呂暉曰老人解造真龍欲為制之遂令玄冥入爐扇閉戶牖三日夜門開呂暉等搜覓已失所在鏡爐前獲書曰盤龍盤龍隱於鏡中分時有象變化無窮興雲吐霧行雨生風玉筍淚也菱花鏡也

贈段七娘

羅襪凌波生網塵那能得計訪情親
千杯綠酒何辭醉
一面紅粧惱殺人

別內赴徵三首

王命三徵去未還明朝離別出吳關
白玉高樓看不見

相思須上望夫山

齊賢曰姑熟望夫山見前

其二

出門妻子強牽衣問我西行幾日歸
歸時儻佩黃金印

莫學蘇秦不下機

齊賢曰蘇秦妻不下機事見前

其三

翡翠為樓金作梯誰人獨宿倚門啼夜坐寒燈連曉月

行行淚盡楚關西

齊賢曰楚關西即武關在楚西界者

秋浦寄內

我今尋陽去辭家千里餘結荷倦水宿却寄大雷書雖
不同辛苦愴離各自居我自入秋浦三年北信疎紅顏
愁落日白髮不能除有客自梁苑手携五色魚開魚得
錦字歸問我何如江山雖道阻意合不為殊

齊賢曰尋陽郡志大

雷口去舒州望江縣三十里秋浦梁苑魚錦字並見前
士贊曰大雷書是書鮑照登大雷岸與妹書事按所書
曰吾自發寒雨全行日少加秋潦浩汗山溪漲至度斤
思邊劍徑遊棧石星飯結荷衣水宿旅食貧辛波略壯
闊始以今日食時僅及大雷塗登千里日踰十
晨嚴霜添節悲風斷鵬去親為客如何如何

自代內贈

寶刀裁流水無有斷絕時妾意逐君行纏綿亦如之別
來門前草秋巷春轉碧掃盡更還生萋萋滿行跡鳴鳳
始相得雄驚雌各飛遊雲落何山一往不見歸估客發
大樓知君在秋浦梁苑空錦衾陽臺夢行雨妾家三作

相失勢去西秦猶存舊歌管淒清聞四鄰曲度入紫雲
啼無眼中人妾似井底桃開花向誰笑君如天上月不
肯一迴照窺鏡不自識別多憔悴深安得秦吉了為人
道寸心

此太白自道也齊賢曰大樓山隸宣城秋浦梁
苑陽臺行雨曲度入紫雲事並見前秦吉了出
邕及占城即結遶鳥能言
勝於鸚鵡黑色兩眉獨黃

秋浦感主人歸燕寄內

霜凋楚關木始知殺氣嚴寥寥金天廓婉婉綠紅潛胡
燕別主人雙雙語前簷三飛四迴顧欲去復相瞻豈不

戀華屋終然謝珠簾我不及此鳥遠行歲已淹寄書道

中嘆淚下不能絨

齊賢曰陽廣記曰胡燕習斑聲小珠簾見前士贊曰月令仲秋之月殺氣

浸盛孟秋之月黃帝少皞註曰少皞金天氏

送內尋廬山女道士李騰空二首

君尋騰空子應到碧山家水舂雲母碓風掃石楠花若

戀幽居好相邀弄紫霞

齊賢曰本草雲母久服輕身延年生泰山山谷石楠生華陰山

谷葉狀如枇杷

其二

多君相門女學道愛神仙素手掬青靄羅衣曳紫煙一

往屏風疊乘鸞着玉鞭

一本作
不著鞭

贈內

三百六十日日日醉如泥雖為李白婦何異太常妻

賢齊

曰後漢周澤為太常卧病齋宮其妻哀澤老病窺問所
苦澤大怒以為干犯齋禁收送詔獄時人語曰生世不
諧作太常妻一年三百六
十日一日不齋醉如泥

在潯陽非所寄內

聞雞知慟哭行啼入府中多君同蔡琰流淚請曹公知

登吳章嶺昔與死無分崎嶇行石道外折入青雲相見

若悲嘆哀聲那可聞

齊賢曰蔡琰再嫁董卓紀時為曹操屯田都尉犯法當死文姬詣曹請

之時公卿名士滿堂操曰蔡伯喈女在外今為諸公見之及進蓬首徒行叩頭請罪音詞清辨音甚酸哀公曰文狀已去柰何姬曰公廐馬萬匹虎士成林何惜疾足一騎而不濟垂死之命乎公感其言追原紀罪

南流夜郎寄內

夜郎天外怨離居明月樓中音信疎北鴈春歸看欲盡

南來不得豫章書

越女詞五首

長干吳兒女眉目艷星月屐上足如霜不着鴉頭襪

賢齊

曰長干見前士贊曰莊子云眉目顏色之好

其二

吳兒多白皙好為蕩舟劇賣眼擲春心折花調行客

賢齊

曰毛詩註皙白色也

其三

耶溪採蓮女見客棹歌迴笑入荷花去佯羞不出來

賢齊

曰越州若耶溪徐浩改為五雲溪

其四

東陽素足女會稽素舸郎相看月未墮白地斷肝腸

賢齊

曰唐婺州東山
郡越州會稽郡

其五

鏡湖水如月耶溪女如雪新粧蕩新波光景兩奇絕

賢齊

曰明皇賜賀知章
鏡湖剡溪一曲

浣紗石上女

玉面耶溪女青娥紅粉妝一雙金齒屐兩足白如霜

示金陵子

一作金陵子詞

金陵城東誰家子竊聽琴聲碧牕裏落花一片天上來
隨人直度西江水楚歌吳語嬌不成似能未能最有情
謝公正要東山妓攜手林泉處處行

齊賢曰漢書註師古曰楚歌者為楚

人歌猶言吳歌越吟

出妓金陵子呈盧六四首

安石東山三十春傲然攜妓出風塵樓中見我金陵子

何似陽臺雲雨人

士贊曰事並見前

其二

南國新豐酒東山小妓歌對君君不樂花月柰愁何

士
贊

曰事並

見前

其三

東道煙霞主西江詩酒筵相逢不覺醉日墮歷陽川

其四

小妓金陵歌楚聲家僮丹砂學鳳鳴我亦為君飲清酒

君心不肯向人傾

巴女詞

巴水急如箭
巴船去若飛
十月三千里
卽行幾歲歸

哀傷

六首

哭晁卿行

日本晁卿辭帝都
征帆一片繞蓬壺
明月不歸沉碧海

白雲愁色滿蒼梧

士贊曰日本國蓬壺碧海
蒼梧白雲等事並見前

自溧水道哭王炎三首

宣州

白楊雙行行
白馬悲路傍
晨興見曉月
更似發雲陽
溧

水通吳關逝川去未央故人萬化盡閉骨茅山岡天上
墜玉棺泉中掩龍章名飛日月上義與風雲翔逸氣竟
莫展英圖俄天傷楚國一老人來嗟龔勝亡有言不可

道雪泣憶蘭芳

齊賢曰雲陽溧水吳關未央宮茅山玉棺事並見前晉書稽康身長七尺八寸

美詞氣有風儀不自藻飾人以為龍章鳳姿天質自然漢書龔勝死時年七十九有老父來弔哭甚哀哀既而

曰嗟乎薰以香自燒膏以明自銷龔生竟天年非吾徒也遂超而出莫知其誰

其二

王公希代寶棄世一何早弔死不及哀殯宮已秋草悲

來欲脫劍挂向何枝好哭向茅山雖未摧一生淚盡丹

陽道

齊賢曰左傳贈死不及尸弔生不及哀士贊曰季札挂劍徐君墓丹陽茅山事並見前

其三

王家碧瑤樹一樹忽先摧海內故人泣天涯弔鶴來未

成霖雨用先失濟川材一罷廣陵散鳴琴更不開

齊賢曰世

說王戎云太尉神姿高徹如瑤林瓊樹自然是風塵表物太尉王衍也陶侃母死有二客來弔不哭而退化為雙鶴冲天而去說命曰若歲大旱用汝作霖雨若濟巨川用汝作舟楫嵇康臨刑曰廣陵散於茲絕矣

哭宣城善釀紀叟

紀叟黃泉裏還應釀老春夜臺無曉日沽酒與何人

一作

題戴老酒店云戴老黃泉下還應
醉大春夜臺無李白沽酒與何人

宣城哭蔣徵君華

敬亭埋玉樹知是蔣徵君安得相如草空餘封禪文池

臺空有月詞賦舊凌雲獨挂延陵劍千秋在古墳

齊賢曰敬

亭山隸宣城漢書相如病甚天子使使往取書相如已死家無遺
書問其妻曰長卿未常有書平時書均已被人取去長卿未死時
為二卷書曰有使來求書奏之其遺札言封禪事使者奏焉天子
異之相如奏大人賦天子大說飄飄然有凌雲氣遊天地之間意

李太白集分類補註卷二十五

欽定四庫全書

李太白集分類補註卷二十六

宋 楊齊賢 集註

元 蕭士贇 補註

表 三首書 六首總九首

爲吳王謝責赴行在遲滯表

臣某言伏蒙聖恩追赴行在臣誠惶誠恐頓首稽首臣
聞胡馬矯首嘶北風以跼顧越禽歸飛戀南枝而刷羽

所以流波思其舊浦落葉墜於本根在物尚然矧於臣
子臣位叨盤石辜負明時才闕總戎謬當強寇駕拙有
素天實知之伏惟陛下重紐乾綱再清國步慙臣不逮
賜臣生全歸見白日死無遺恨然臣年過耳順風瘳日
加鋒鏑殘骸劣有餘喘雖決力上道而心與願違貴貪
尺寸之程轉增犬馬之戀非有他故以疾淹留今大舉
天兵掃除戎羯所在郵驛徵發交馳臣逐便水行難於
陸進瞻望丹闕神魂若飛慙墜履之還收喜遺簪之再

御不勝涕戀屏營之至謹奉表以聞

為宋中丞請都金陵表

臣某言臣誠惶誠恐頓首稽首臣聞社稷無常奉明者
守之君臣無定位闇者失之所以父作子述重光疊輝
天未絕晉人惟戴唐以功德有厚薄運數有修短功高
而福祚長永德薄而政教陵遲三后之姓於今為庶非
一朝也伏惟陛下欽六聖之光訓擁千載之鴻休有國
之本羣生屬望粵自明兩光岐之陽昔有周太王之興

發跡於此天啓有類豈人事歟皇朝百五十年金革不作逆胡竊號剝亂中原雖平嵩丘填伊洛不足以掩宮城之骸骨決洪河灑秦雍不足以蕩犬羊之羶臊毒浸區宇憤盈穹旻此乃猛士奮劍之秋謀臣運籌之日夫不拯橫流何以彰聖德不斬巨猾無以興神功十亂佐周而克昌四兇及虞而乃去去元兇者非陛下而誰且道有興廢代有中季漢當三七莽亦為災赤伏再起丕業終光非陛下至神至聖安能勃然中興乎以臣料人

事得失敢獻疑於陛下臣猶望愚夫千慮或冀一得何者賊臣楊國忠蔽塞天聰屠割黎庶女弟席寵傾國美權九土泉貨盡歸其室怨氣上激水旱薦臻重罹暴亂百姓力屈即欲平殄蝥賊恐難應期且圖萬全之計以成一舉之策今自河以北為胡所凌自河之南孤城四壘大盜蠶食割為洪溝宇宙峴岼昭然可覩臣伏見金陵舊都地稱天險龍盤虎踞開局自然六代皇居五福斯在雄圖霸跡隱軫由存咽喉控帶縈錯如繡天下衣

冠士庶避地東吳永嘉南遷未盛於此臣又聞湯及盤
庚五遷其邑典謨訓誥不以爲非衛文徙居楚丘風人
流詠伏惟陛下因萬人之蕩析乘六合之譁張去扶風
萬有一危之近邦就金陵太山必安之成策苟利於物
斷在宸衷況齒革羽毛之所生梗枏豫章之所出元龜
大貝充牣其中銀坑鐵冶連縣相屬剡銅陵爲金穴煮
海水爲鹽山以征則兵強以守則國富橫制八極克復
兩京俗畜來蘇之歡人多俟后之望陛下西以峨嵋爲

壁壘東以滄海為溝池守海陵之倉獵長洲之苑雖上
林五柞復何加焉上皇居天帝運昌之都儲精真一之
境有虞則北閉劍閣南扃瞿塘蚩尤共工五兵莫向二
聖高枕人何憂哉飛章問安往復巴峽朝發白帝暮宿
江陵首尾相應率然之舉不勝屏營瞻雲望日之至謹
先奉表陳情以聞

爲宋中丞自薦表

臣某聞天地閉而賢人隱雲雷屯而君子用臣伏見前

翰林供奉李白年五十有七天寶初五府交辟不求聞達亦由子真谷口名動京師上皇聞而悅之召入禁掖既潤色於鴻業或間進於王言雍容揄揚特見褒賞為賤臣詐詭遂放歸山間居製作言盈數萬屬逆胡暴亂避地廬山遇永王東巡脅行中道奔走却至彭澤具已陳首前後經宣慰大使崔渙及臣推覆清雪尋經奏聞臣聞古之諸侯進賢受上賞蔽賢受顯戮若三道稱美必九錫光榮垂之典謨永以爲訓臣所管李白實審無

辜懷經濟之才抗巢由之節文可以變風俗學可以究
天人一命不需四海稱屈伏惟陛下大明廣運至道無
偏收其希世之英以為清朝之寶昔四皓遭高皇而不
起翼惠帝而方來君臣離合亦各有數豈使此人名揚
宇宙而枯槁當年傳曰舉逸人而天下歸心伏惟陛下
迴太陽之高暉流覆盆之下照特請拜一京官獻可替
否以光朝列則四海豪俊引領知歸不勝縷縷之至敢
陳薦以聞

代壽山答孟少府移文書

淮南小壽山謹使東峰金衣雙鶴銜飛雲錦書于維揚
孟公足下曰僕包大塊之氣生洪荒之間連翼軫之分
野控荆衡之遠勢盤薄萬古邈然星河憑天霓以結峰
倚斗極而橫嶂頗能攢吸霞雨隱居靈仙產隋侯之明
珠蓄卞氏之光寶罄宇宙之美殫造化之奇方與崑崙
抗行閭風接境何人間巫廬台霍之足陳耶昨於山人
李白處見吾子移文責僕以多奇鄙一作此僕以特秀而

盛談三山五岳之美謂僕小山無名無德而稱焉觀乎
斯言何太謬之甚也吾子豈不聞乎無名為天地之始
有名為萬物之母假令登封禪祀曷足以大道譏耶然
皆損人費物庖殺致祭暴殄草木鐫刻金石使載圖典
亦未足為貴乎且達人莊生常有餘論以為尺鷃不羨
於鵬鳥秋毫可並於太山由斯而談何小大之殊也又
怪於諸山藏國寶隱國賢使吾君膀道燒山披訪不獲
非通談也夫皇王登極瑞物昭至蒲萄翡翠以納貢河

圖洛書以應符設天網而掩賢窮月竊以率職天不秘
寶地不藏珍風威百蠻春養萬物王道無外何英賢珍
玉而能伏匿於巖穴耶所謂勝道燒山此則王者之德
未廣矣昔太公大賢傳說明德棲渭川之水藏虞虢之
巖卒能形諸兆朕感乎夢想此則天道闇合豈勞乎搜
訪哉果投竿詣麾捨築作相佐周文讚武丁總而論之
山亦何罪乃知巖穴為養賢之域林泉非秘寶之區則
僕之諸山亦何負於國家矣近者逸人李白自峨嵋而

來爾其天為容道為貌不屈已不干人巢由以來一人而已乃蚪蟠龜息遁乎此山僕嘗弄之以綠綺臥之以碧雲漱之以瓊液餌之以金砂既而童顏益春真氣愈茂將欲倚劍天外挂弓扶桑浮四海橫八荒出宇宙之寥廓登雲天之渺茫俄而李公仰天長吁謂其友人曰吾未可去也吾與爾達則兼濟天下窮則獨善一身安能食君紫霞蔭君青松乘君鸞鶴駕君蚪龍一朝飛騰為方丈蓬萊之人耳此則未可也乃相與卷其丹書匣

其瑤瑟申管晏之談謀帝王之術奮其智能願為輔弼
使寰區大定海縣清一事君之道成榮親之義畢然後
與陶朱留侯浮五湖戲滄洲不足為難矣即僕林下之
所隱容豈不大哉必能資其聰明輔以正氣借之以物
色發之以文章雖煙花中貧沒齒無恨其有山精木魅
雄虺猛獸以驅之四荒磔裂原野使影跡絕滅不干戶
庭亦遣清風掃門明月侍坐此乃養賢之心實亦勤矣
孟子孟子無見深責耶明年青春求我於此巖也

上安州李長史書

白嶽崎歷落可笑人也雖然頗嘗覽千載觀百家至於
聖賢相似厥衆則有若似於仲尼紀信似於高祖牢之
似於無忌宋玉似於屈原而遙觀君侯竊疑魏洽便欲
趨就臨然舉鞭遲疑之間未及迴避且理有疑誤而成
過一本無此一字事有形似而類真惟大雅含弘方能恕之也
白少頗周慎忝聞義方入暗室而無欺屬昏行而不變
今小人履疑誤形似之迹君侯流愷悌矜恤之恩戢秋

霜之威布冬日之愛睟容有穆怒顏不彰雖將軍息恨
於長孫之前此無慙德司空受揖於元淑之際彼未為
賢一言見寬九死非謝白孤劍誰託悲歌自憐迫於恓
惶席不暇暖寄絕國而何仰若浮雲而無依南徙莫從
北遊失路遠客汝海近還邨城昨遇故人飲以狂藥一
酌一笑陶然樂酣困河朔之清觴飫中山之醇酎屬早
日初眩晨霾未收乏離朱之明昧王戎之視青白其眼
曹而前行亦何異抗莊公之輪怒螳螂之臂御者趨召

明其是非入門鞠躬精魄飛散昔徐邈緣醉而賞魏王
却以為賢無鹽因醜而獲齊君待之逾厚白妄人也安
能比之上挂國風相鼠之譏下懷周易履虎之懼慙以
固陋禮而遣之幸容甯越之辜深荷王公之德銘刻心
骨退思狂僭五情冰炭罔知所措晝愧於影夜慙於魄
啟處不惶戰跼無地伏惟君侯明奪秋月和均韶風掃
塵辭場振發文雅陸機作太康之傑士未可比肩曹植
為建安之雄才惟堪捧駕天下豪俊翕然趨風白之不

敏竊慕餘論何圖叔夜潦倒不切於事情正平猖狂自
貽於恥辱一忤容色終身厚顏敢昧負荆請罪門下儻
免以訓責恤其愚蒙如能伏劍結纓謝君侯之德敢以
近所為春遊救苦寺詩一首十韻石巖寺詩一首八韻
上楊都尉詩一首三十韻辭旨狂野貴露下情輕干視
聽幸乞詳覽

與賈少公書

宿昔惟清勝白絲疾疲繭去期恬退才微識淺無足濟

時雖中原橫潰將何以救之王命崇重大總元戎辟書
三至人輕禮重嚴期迫切難以固辭扶力一行前觀進
退且殷深源廬嶽十載時人觀其起與不起以卜江左
興亡謝安高臥東山蒼生屬望白不樹矯抗之跡恥振
玄邈之風混遊漁商隱不絕俗豈徒販賣雲壑要射虛
名方之二子實有慙德徒塵忝幕府終無能為唯當報
國薦賢持以自免斯言若謬天實殛之以足下深知具
申中欸惠子知我夫何間然勾當小事但增悚惕一作佩

為趙宣城與楊右相書

某啓辭違積年伏戀軒屏首冬初寒伏惟相公尊體起居萬福某蒙恩才朽齒邁徒延聖日少忝末吏本乏遠圖中年廢缺分歸園壑昔相公秉國憲之日一拔九霄拂刷前恥昇騰晚官恩貸稠疊實戴丘山落羽再振枯鱗旋躍運以大風之舉假以摩天之翔衣繡霜臺含香華省宰劇慙強項之名酌貪礪清心之節三典列郡寂無成功但宣布王澤式酬天獎伏惟相公開張徽猷寅

亮天地入夔龍之室持造化之權安石高枕蒼生是仰
某鳴躍無已剪拂因人銀章朱紱坐榮宦達身荷宸眷
目識龍顏既齊飛於鴛鴦復寄跡於門館皆相公大造
之力也而鐘鳴漏盡夜行不息止足之分實媿古人犬
馬戀主迫於西汜所冀枯松晚歲無改節於風霜老驥
餘年期盡力於蹄足上答明主下報相公悽悽之誠屏
息於此伏惟相公收遺簪於少昊念亡弓於楚澤哀當
益壯結草知歸瞻望恩光無忘景刻

與韓荊州書

白聞天下談士相聚而言曰生不用封萬戶侯但願一識韓荊州何令人之景慕一至於此耶豈不以有周公之風躬吐握之事使海內豪俊奔走而歸之一登龍門則聲譽十倍所以龍盤鳳逸之士皆欲收名定價於君侯願君侯不以富貴而驕之寒賤而忽之則三千賓中有毛遂使白得穎脫而出即其人焉白隴西布衣流落楚漢十五好劍術徧干諸侯三十成文章歷抵卿相雖長

不滿七尺而心雄萬夫王公大臣許與氣義此疇曩心
跡安敢不盡於君侯哉君侯制作侔神明德行動天地
筆參於造化學究於天人幸願開張心顏不以長揖見
拒必若接之以高宴縱之以清談請日試萬言倚馬可
待今天下以君侯為文章之司命人物之權衡一經品
題便作佳士而君侯何惜階前盈尺之地不使白揚眉
吐氣激昂青雲耶昔王子師為豫州未下車即辟荀慈
明既下車又辟孔文舉山濤作冀州甄拔三十餘人或

為侍中尚書先代所美而君侯亦薦一嚴協律入為秘書郎中間崔宗之房習祖黎昕許瑩之徒或以才名見知或以清白見賞白每觀其銜恩撫躬忠義奮發白以此感激知君侯推赤心於諸賢腹中所以不歸他人而願委身國士儻急難有用敢效微軀且人非堯舜誰能盡善白謨猷籌畫安能盡矜至於制作積成卷軸則欲塵穢視聽恐雕蟲小技不合大人若賜觀芻蕘請給以紙墨無人書之然後退歸間軒繕寫呈上庶青萍結綠

長價於薛卞之門幸惟下流大開獎飾惟君侯圖之

上安州裴長史書

白聞天不言而四時行地不語而百物生白人焉非天地安得不言而知乎敢刻心析肝論舉身之事便當談笑以明其心而粗陳其大綱一快憤懣惟君侯察焉白本家金陵世為右姓遭沮渠蒙遜難奔流咸秦因官寓家少長江漢五歲誦六甲十歲觀百家軒轅以來頗得間矣嘗橫經籍書制作不倦迄于今三十春矣以為士

生則桑弧蓬矢射乎四方故知大丈夫必有四方之志
乃杖劍去國辭親遠遊南窮蒼梧東涉溟海見鄉人相
如大誇雲夢之事云楚有七澤遂來觀焉而許相公家
見招妻以孫女便憩跡于此至移三霜焉曩昔東遊維
揚不逾一年散金三十餘萬有落魄公子悉皆濟之此
則是白之輕財好施也又昔與蜀中友人吳指南同遊
於楚指南死於洞庭之上白禪服慟哭若喪天倫炎月
伏屍泣盡繼之以血行路聞者悉皆傷心猛虎前臨堅

守不動遂權殞於湖側便之金陵數年來觀筋骨尚在
白雪泣持刀躬申洗削裹骨徒步負之而趨寢輿攜持
無輟身手遂丐貸營葬於鄂城之東故鄉路遙魂魄無
主禮以遷窆式昭朋情此則是白存交重義也又昔與
逸人東嚴子隱於岷山之陽白巢居數年不跡城市養
奇禽千計呼皆就掌取食了無驚猜廣漢太守聞而異
之詣廬親覩因舉二人以有道並不起此則白養高忘
機不屈之跡也又前禮部尚書蘇公出為益州長史白

於路中投刺待以布衣之禮因謂羣寮曰此子天才英
麗下筆不休雖風力未成且見專車之骨若廣之以學
可以相如比肩也四海明識具知此談前此郡督馬公
朝野豪彥一見盡禮許為奇才因謂長史李京之曰諸
人之文猶山無煙霞春無草樹李白之文清雄奔放名
章俊語絡繹間起光明洞徹句句動人此則故交元丹
親接斯議若蘇馬二公愚人也復何足陳儻賢賢也白
有可尚夫唐虞之際於斯為盛有婦人焉九人而已是

知才難不可多得白野人也頗工於文惟君侯顧之無
按劍也伏惟君侯貴而且賢鷹揚虎視齒若編貝膚如
凝脂昭昭乎若玉山上行朗然映人也而高義重諾名
飛天京四方諸侯聞風暗許倚劍慷慨氣干虹蜺月費
千金日宴羣客出躍駿馬入羅紅顏所在之處賓朋成
市故時人歌曰賓朋何喧喧日夜裴公門願得裴公之
一言不須驅馬埒華軒白不知君侯何以得此聲於天
壤之間豈不由重諾好賢謙以得也而晚節改操棲情

翰林天才超然度越作者屈佐鄖國時惟清哉稜威雄
雄下帽羣物白竊慕高義已經十年雲山間之造謁無
路今也運會得趨末塵承顏接辭八九度矣常欲一雪
心跡崎嶇未便何圖謗言忽生衆口攢毀將恐投杼下
客震於嚴威然自明無辜何憂悔吝孔子曰畏天命畏
大人畏聖人之言過此三者鬼神不害若使事得其實
罪當其身則將浴蘭沐芳自屏於烹鮮之地惟君侯死
生不然投山竄海轉死溝壑豈能明目張膽託書自陳

耶昔王東海問犯夜者曰何所從來答曰從師受學不
覺日晚王曰吾豈可鞭撻甯越以立威名想君侯通人
必不爾也願君侯惠以大遇洞開心顏終乎前恩再辱
英盼白必能使精誠動天長虹貫日直度易水不以為
寒若赫然作威加以大怒不許門下逐之長途白即膝
行於前再拜而去西入秦海一觀國風永辭君侯黃鵠
舉矣何王公大人之門不可以彈長劍乎

李太白集分類補註卷二十六

欽定四庫全書

李太白集分類補註卷二十七

宋 楊齊賢 集註

元 蕭士贇 補註

序上 一十首

暮春江夏送張祖監丞之東都序

吁咄哉僕書室坐愁亦已久矣每思欲遐登蓬萊極目
四海手弄白日頂摩青穹揮斥幽憤不可得也而金骨

未變玉顏已緇何常不捫松傷心撫鶴歎息誤學書劍
薄遊人間紫微九重碧山萬里有才無命甘於後時劉
表不用於禰衡暫來江夏賀循喜逢於張翰且樂船中
達人張侯大雅君子統泛舟之役在清川之湄談玄賦
詩連興數月醉盡花柳賞窮江山王命有程告以行邁
烟景晚色慘為愁容繫飛帆於半天泛淥水於遙海欲
去不忍更開芳樽樂雖囊中趣逸天半平生酣暢未若
此筵至於清談浩歌雄筆麗藻笑飲醪酒醉揮素琴余

實不愧於古人也揚袂遠別何時歸來想洛陽之秋風
將鱸魚以相待詩可贈遠無乃闕乎

奉餞十七翁二十四翁尋桃花源序

昔祖龍滅古道嚴威刑煎熬生人若墜大火三墳五典
散為寒灰築長城建阿房并諸侯殺豪俊自謂功高義
皇國可萬世思欲凌雲氣求仙人登封太山風雨暴作
雖五松受職草木有知而萬象乖度禮刑將弛則綺皓
不得不遁於南山魯連不得不蹈於東海則桃源之避

世者可謂超昇先覺夫指鹿之儔連頸而同死非吾黨
之謂乎二翁耽老氏之言繼少卿之作文以述大雅道
以通至精卷舒天地之心脫落神仙之境武陵遺跡可
得而窺焉問津利往水引漁者花藏仙谿春風不知從
來落英何許流出石洞來入晨光盡開有良田名池竹
果森列三十六洞別為一天耶今扁舟而行笑謝人世
阡陌未改古人依然白雲何時而歸來青山一去而誰
往諸公賦桃源以美之

夏日陪司馬武公與羣賢宴姑熟亭序

通驛公館南有水亭焉四蔓翬飛嶢絕浦與蓋有前攝
令河東薛公棟而宇之今宰隴西李公明化開物成務
又橫其梁而閣之晝鳴閒琴夕酌清月蓋為接輿軒祖
遠客之佳境也製置既久莫知何名司馬武公長材博
古獨映方外因據胡牀岍幘嘯詠而謂前長史李公及
諸公曰此亭跨姑熟之水可稱為姑熟亭焉嘉名勝槩
自我作也且夫曹官紱冕者大賢處之若遊青山卧白

雲逍遙偃傲何適不可小才居之窘而自拘悄若桎梏
則清風朗月河英嶽秀皆為棄物安得稱焉所以司馬
南隣當文章之旗鼓翰林客卿揮辭鋒以戰勝名教樂
地無非得俊之場也千載一時言詩紀志

江夏送林公上人遊衡嶽序

江南之仙山黃鶴之爽氣偶得英粹後生俊人林公世
為豪家此土之秀落髮歸道專精律儀白月在天朗然
獨出既灑落於彩翰亦諷誦於人口閒雲無心與化偕

往欲將振五樓之金策浮三湘之碧波乘杯沂流考室
名嶽瞰憩冥壑凌臨諸天登祝融之峰巒望長沙之烟
火遙謝舊國誓遺歸蹤百千開士稀有此者余所以歎
其峻節揚其清波龍象先輩迴眸拭視比夫汨泥沙者
相去如牛之一毛昔智者安禪於台山遠公托志於廬
嶽高標勝槩斯亦嚮慕哉紫霞搖心青楓夾岬目斷川
上送君此行羣公臨流賦詩以贈

金陵與諸賢送權十一序

斯高柄秦嬴世不二三傑伏草與漢並出莽夷朱暉耿
鄧乃起自古英達未必盡用於當年去就之理在大運
爾我君六葉繼聖熙乎玄風三清垂拱穆然紫極天人
其一哉所以青雲豪士散在商鈞四坐明哲皆清朝旅
人吾希風廣成蕩漾浮世素受寶訣為三十六帝之外
臣即四明逸老賀知章呼余為謫仙人蓋寶錄耳而嘗
採姪女於江華收河車於清溪與天水權昭夷服勤爐
火之業久矣之子也冲恬淵靜翰才峻發白每一篇一

札皆昭夷之所操吁捨我而南若折羽翼時歲律寒苦
天風枯聲雲帆涉漢罔若絕雷舉目四顧霜天崢嶸銜
杯叙離羣子賦詩以出餞酒仙翁李白辭

春於姑熟送趙四流炎方序

白以鄒魯多鴻儒燕趙饒壯士蓋風土之然乎趙少翁
才貌瓌雅志氣豪烈以黃綬作尉泥蟠當塗亦雞棲鶴
籠不足以窘束鸞鳳一作鳳耳以疾惡抵法遷于炎方辭

高堂而墜心指絕國以搖恨天與水遠雲連山長借光

影於頃刻開壺觴於洲渚黃鶴曉別愁聞命子之聲青
楓暝色盡是傷心之樹然自吳瞻秦日見喜氣上當攬
玉弩摧狼狐洗清天地雷雨必作冀白日迴照丹心可
明巴陵半道坐見還吳之棹令雪解而松栢振色氣和
而蘭蕙開芳僕西登天門望子於西江之上吾賢可流
水其道浮雲其身通方大適何往不可何戚戚於路歧
哉

秋於敬亭送從姪昂遊廬山序

余小時大人令誦子虛賦私心慕之及長南遊雲夢覽
七澤之壯觀酒隱安陸蹉跎十年初嘉興季父謫長沙
西還時余拜見預飲林下俦乃稚子嬉遊在傍今來有
成鬱負秀氣吾衰久矣見爾慰心申悲導舊破涕為笑
方告我遠涉西登香爐長山橫蹙九江却轉瀑布天落
半與銀河爭流騰虹奔電溼射萬壑此宇宙之奇詭也
其上有方湖石井不可得而窺焉羨君此行撫鶴長嘯
恨丹液未就白龍來遲使秦人著鞭先往桃花之水孤

負夙願慙歸名山終期後來携手五嶽情以送遠詩寧
闕乎

送黃鍾之鄱陽謁張使君序

東南之美者有江夏黃公焉白竊飲風流始接談笑亦
有抗節玉立光輝炯然氣高時英辯折天口道可濟物
志棲無垠鄱陽張公朝野榮望愛客接士即原嘗春陵
之亞焉每欽其辭華懸榻見往而黃公因訪古跡便從
貴遊乃僑裝撰行去國遐陟諸子銜酒惜別沾巾分贈

沉醉烟夕惆悵涼月天南迴以變夏火西飛而獻秋汀
葭颯然海草微落夫子行邁我心若何毋金玉爾音而
有遐心湖水演沔最哉是行共賦武昌釣臺篇以慰別
情耳

早春於江夏送蔡十還家雲夢序

吾觀蔡侯奇人也爾其才高氣遠有四方之志不然何
周流宇宙太多耶白遐窮冥搜亦已早矣海草三綠不
歸國門又更逢春再結鄉思一見夫子冥心道存窮朝

欽定四庫全書

李太白集分類補註
卷二十七

七

晚以作宴驅煙霞以輔賞朗笑明月時眠落花斯遊無
何尋告睽索來暫觀我去還愁人乃浮漢陽入雲夢鄉
柰云叩歸魂亦飛且青山綠楓累道相接遇勝因賞利
君前行既非遠離曷足多嘆秋七月結遊鏡湖無僭我
期先子而往敬慎好去終當早來無使耶川白雲不得
復弄爾鄉中廖公及諸才子為詩略謝之

秋日於太原南柵餞陽曲王贊公賈少公石艾
尹少公應舉赴上都序

天王三京北都居一其風俗遠蓋陶唐氏之人歟襟四
塞之要衝控五原之都邑雄藩劇鎮非賢莫居則陽曲
丞王公神仙之胄也爾其學鏡千古知周萬殊又若少
府賈公以述作之雄也鼇弄筆海虎攫辭場又若石艾
尹少公廊廟之器口折黃馬手揮青萍咸道貫於人倫
名飛於日下實難沈屈永懷青霄劍有隱而氣衝七星
珠雖潛而光照萬壑今年春皇帝有事千畝湛恩八埏
大搜羣才以緝邦政而王公以令宰見舉賈公以王霸

欽定四庫全書

李太白集分類補註
卷二十七

八

昇聞海激佇乎三千天飛期於六月必有以也豈徒然
哉有從兄太原主簿舒才華動時規謀匠物乃黜翠幕
筵虹梁瓊羞霞開羽觴電舉然後抗目遠覽憑軒高吟
屏俗事於煩襟結浮歡於落景俄而皓月生海來窺醉
容黃雲出關半起秋色數君乃輟酌慷慨搖心促裝望
丹闕而非遠揮玉鞭而且去白也不敏先鳴翰林幸叨
玳瑁之筵敢竭麒麟之筆請各探韻賦詩寵行

李太白集分類補註卷二十七

欽定四庫全書

集部

李太白集分類補註卷二十八至三十一

詳校官侍郎_臣謝墉

檢討_臣何思鈞覆勘

總校官編修_臣王燕緒

校對官學正_臣翁樹棠

謄錄監生_臣趙廷璋

欽定四庫全書

李太白集分類補註卷二十八

宋 楊齊賢 集註

元 蕭士贇 補註

序下

一十首

送戴十五歸衡嶽序

白上探玄古中觀人世下察交道海內豪俊相識如浮雲自謂德叅夷顏才亞孔墨莫不名由口進實從事退

而風義可合者厥惟戴侯戴侯居長沙稟湖嶽之氣少
長咸洛窺霸王之圖精微可以入神懿重可以崇德謨
猷可以尊主文藻可以成化兼以五才統以四美何往
而不濟也其二三諸昆皆以才秀擢用辭翰炳發昇聞
天朝而此君獨潛光後世以期大用鯤海未躍鵬霄愍
然不遠千里訪余以道邠國之秀有廖侯焉人倫精鑒
天下獨立每延以宴謔許為通人獨孤有鄰及薛諸公
咸亦以為信然矣屬明主未夢且歸衡陽憩祝融之雲

峯弄茱萸之湍水軒騎糾合祖於魏公之林亭笙歌鳴
秋劒舞增氣沉江葉墜綠沙鴻冥飛登高送遠使人心
醉見周張二子為論平生鷄黍之期當速赴也

早夏於將軍叔宅與諸昆季送傳八之江南序
易曰觀乎人文以化成天下窮此道者其惟傳侯耶侯
篇章驚新海內稱善五言之作妙絕當時陶公愧田園
之能謝客慙山水之美佳句藉藉人為美談前許州司
馬宋公蘊永清之姿重傳侯玉潤之德妻以其子鳳凰

于飛潘楊之好斯為睦矣僕不佞也忝于芳塵宴同一
筵心契千古清酌連曉玄談入微歡攜無間旋告睽拆
將軍叔英略蓋古英明洞神天王貴宗誕育賢子八龍
增秀以列次五色相輝而有文會言高樂曉饒金門洗
德絃觴怡顏朱明草木已盛且江嶂若畫賞盈前途自
然屏間坐遊鏡裏行到霞月千里足供文章之用哉征
帆空懸落日相迫二李揮翰詩其贈焉

冬日於龍門送從弟京兆參軍令問之淮南觀

省序

紫雲仙季有英風焉吾家見之若衆星之有月貴則天
王之令弟實則海嶽之奇精遊者所謂風生玉林清明
蕭灑真不虛也常醉目吾曰兄心肝五臟皆錦繡耶不
然何開口成文揮翰霧散吾因撫掌大笑揚眉當之使
王澄再聞亦復絕倒觀夫筆走羣象思通神明龍章炳
然可得而見歲十二月拜省于淮南思白華之長吟眺
黃雲之晚色目斷心盡情懸高堂傾蘭醕而送行赫金

鞍而照地錯轂蹲野朝英滿筵非才名動時何以及此
日落酒罷前山陰煙殷勤惠言吾道東坐想洛橋春色
先到淮城見千條之綠楊折一枝以相贈則華萼情在
吾無恨焉羣公賦詩以光榮餞

江夏送倩公歸漢東序

謝安四十卧白雲於東山栢公累徵為蒼生而一起常
與支公遊賞貴而不移大人君子神冥契合正可乃爾
僕與倩公面不忝古人言歸漢東使我心痾夫漢東之

國聖人所出神農之後季梁為大賢爾來寂寂無一物
可紀有唐中興始生紫陽先生先生六十而隱化若繼
跡而起者惟倩公焉蓄壯志而未就期老成於他日且
能傾產重諾好賢攻文即惠休上人與江鮑往復各一
時也僕平生述作罄其草而授之思親遂行流涕惜別
今聖朝已捨季布當徵賈生開顏洗目一見白日冀相
視而笑於新松之山耶作小詩絕句以寫別意辭曰彼
美漢東國川藏明月輝寧知喪亂後更有一珠歸

餞李副使藏用移軍廣陵序

夫功未足以蓋世威不可以震主必挾此者持之安歸
所以彭越醢於前韓信誅於後況權位不及於此者虛
生危疑而潛包禍心小拒王命是以謀臣將啖以節餞
誘而烹之亦由借鴻濤於奔鯨鱣生人於哮虎呼吸江
海橫流百川左縈右拂十有餘郡國計未及誰當其鋒
我副使李公勇冠三軍衆無一旅橫倚天之劍揮駐日
之戈吟嘯四顧熊羆雨集蒙輪扛鼎之士仗干將而星

羅上可以決天雲下可以絕地維翕振虎旅赫張王師
退如山立進若電逝轉戰百勝殭屍盈川水膏於滄溟
陸血於原野一掃瓦解洗清全吳可謂萬里長城橫斷
楚塞不然五嶺之北盡餌於修蛇勢盤地蹙不可圖也
而功大用小天高路遐社稷雖定於劉章封侯未施於
李廣使慷慨之士長吁青雲且移軍廣陵恭揖後命組
練照雪樓船乘風簫鼓沸而三山動旌旗揚而九天轉
良牧出祖烈將登筵歌酣易水之風氣振武安之瓦海

日夜色雲帆中流席闌賦詩以壯三軍之事白也筆已老矣序何能為

澤畔吟詩序

澤畔吟者逐臣崔公之所作也公代業文宗早茂才秀起家校書蓬山再尉關輔中佐于憲車因貶湘陰從宦二十有八載而官未登於郎署何遇時而不偶耶所謂大名難居碩果不食流離乎沅湘摧頽於草莽同時得罪者數十人或才長命夭覆巢蕩室崔公忠憤義烈形

于清辭慟哭澤畔哀形翰墨猶風雅之什聞之者無罪
覩之者作鏡書所感遇總二十章名之曰澤畔吟懼奸
臣之猜常韜之於竹簡酷吏將至則藏之於名山前後
數四蠹傷卷軸觀其逸氣頓挫英風激揚橫波遺流騰
薄萬古至於微而彰婉而麗悲不自我興成他人豈不
云怨者之流乎余覽之愴然掩卷揮涕為之序云

夏日諸從弟登汝州龍興閣序

夫槿榮芳園蟬嘯珍木蓋紀乎南火之月也可以處臺

榭居高明吾之友于順此意也遂卜精勝得乎龍興留
寶馬於門外步金梯於閣上漸出軒戶遐瞻雲天晴山
翠遠而四合暮江碧流而一色屈指鄉路還疑夢中開
襟危欄宛若空外嗚呼屈宋長逝無堪與言起予者誰
得我二季當揮爾鳳藻飛子鸞觴與白雲老兄俱莫負
古人也

秋夜於安府送孟贊府兄還都序

夫士有飾危冠佩長劒揚眉吐諾激昂青雲者咸誇炫

意氣託交王侯若告之急難乃十夫八九我義兄孟子
則不然耶道合而襟期暗親志乖而肝膽楚越鴻鵠鳳
立不循常流孔明披書每觀於大略少君讀易時作於
小文四方賢豪眩然景慕雖長不過七尺而心雄萬夫
至於酒情中酣天機俊發則談笑滿席風雲動天非嵩
丘騰精何以及此白以弱植早飲香名況親承光輝恩
甚華萼他鄉此別誰無恨耶時林風吹霜散下秋草海
鴈嘶月孤飛朔雲驚魂動骨憂瑟瑟落涕抗手緬邁傷如

之何且各賦詩以寵行路

春夜宴從弟桃花園序

夫天地者萬物之逆旅也

一本作萬物者天地之逆旅也

光陰者百代

之過客也而浮生若夢為歡幾何古人秉燭夜遊良有以也況陽春召我以煙景大塊假我以文章會桃花之芳園序天倫之樂事羣季俊秀皆為惠連吾人詠歌獨慙康樂幽賞未已高談轉清開瓊筵以坐花飛羽觴而醉月不有佳詠何伸雅懷如詩不成罰依金谷酒數

冬夜於隨州紫陽先生食霞樓送烟子元演隱
仙城山序

吾與霞子元丹烟子元演氣激道合結神仙交殊身同
心誓老雲海不可奪也歷行天下周求名山入神農之
故鄉得胡公之精術胡公身揭日月心飛蓬萊起食霞
之孤樓鍊吸景之精氣延我數子高談混元金書玉訣
盡在此矣白乃語及形勝紫陽因大誇仙城元侯聞之
乘興將往別酒寒酌醉青田而少留夢魂曉飛度淶水

以先去吾不凝滯於物與時推移出則以平交王侯遁
則以俯視巢許朱紱狎我綠蘿未歸恨不得同棲烟林
對坐松月有所款然銘契潭石乘春當來且抱琴卧花
高枕相待詩以寵別賦而贈之

李太白集分類補註卷二十八

欽定四庫全書

李太白集分類補註卷二十九

宋 楊齊賢 集註

元 蕭士贇 補註

記一首 頌二首 讚一十七首 總二十首

任城縣廳壁記

風姓之後國為任城蓋古之秦縣也在禹貢則南徐之分當周成迺東魯之邦自伯禽到于順公三十二代遭

楚蕩滅因屬楚焉炎漢之後更為郡縣隋開皇三年廢
高平郡移任城於舊居邑乃屢遷井則不改魯境七百
里郡有十一縣任城其衝要東盤琅邪西控鉅野北走
厥國南馳互鄉青帝太昊之遺墟白衣尚書之舊里土
俗古遠風流清高賢良間生掩映天下地博厚川疎明
漢則名王分茅魏則天人列土所以代變豪侈家傳文
章君子以才雄自高小人則鄙朴難治況其城池夾塏
邑屋豐潤香閣倚日凌丹霄而欲飛石橋橫波驚彩虹

而不去其雄麗垓北有如此焉故萬商往來四海縣歷
實泉貨之橐籥為英髦之咽喉故資大賢以主東道製
我美錦不易其人今鄉二十六戶一萬三千三百七十
一帝擇明德以賀公宰之公溫恭克修儼碩有立季野
備四時之氣士元非百里之才撥煩彌閒剖劇無滯鎬
百發克破於楊葉刀一鼓必合於桑林寬猛相濟弦韋
適中一之歲肅而教之二之歲惠而安之三之歲富而
樂之然後青衿向訓黃髮履禮耒耜就役農無游手之

夫杼軸和鳴機罕嚙哦之女物不知化陶然自春權豪
鋤縱暴之心黠吏返淳和之性行者讓於道路任者併
於輕重扶老攜幼尊尊親親千載百年再復魯道非神
明博遠孰能契於此乎白探竒東蒙竊聽輿論輒記於
壁垂之將來俾後賢之操刀知賀公之絕跡者也

趙公西侯新亭頌

惟十有四載皇帝以歲之驕陽秋五不稔乃慎擇明牧
恤南方凋枯伊四月孟夏自淮陰遷我天水趙公作藩

于宛陵祇明命也惟公代秉天憲作程南臺洪柯大本
聿生懿右宜乎哉橫風霜之秀氣鬱王霸之奇畧初以
鐵冠白筆佐我燕京威雄振肅虜不敢視而後鳴琴二
邦天下取則起草三省朝端有聲天子識面宰衡動聽
殷南山之雷剖赤縣之劇強項不屈三州所居大化咸
列碑頌至於是邦也酌古以訓俗宣風以布和平心理
人兵鎮唯靜畫一千里時無莠言退公之暇清眺原隰
以此郡東塹巨海西襟長江咽三吳扼五嶺輜軒錯出

無旬時而息焉出自西郭蒼然古道道寬列樹行無清
陰至有疾雷破山狂飈震壑炎景爍野秋霖灌途馬乏
側於谷口人周章於山頂亭侯靡設逢迎闕如自唐有
天下作牧百數因循齷齪罔恢永圖及公來思大革前
弊實相此土陟降觀之壯其迴岡龍盤沓嶺波起勝勢
交至可以有作方農之隙廓如是營遂鏟崖堙埤驅石
剪棘削污壤增高隅以門以墉乃棟乃宇儉則不陋麗
而不奢森沉閑閑燥濕有庇若鳧之勇如鵬斯騫縈流

鏡轉涵映池底納遠海之餘清瀉蓮峰之積翠信一方
雄勝之郊五馬踟躕之地也長史齊公光又人倫之師
表司馬武公幼成衣冠之髦彥錄事叅軍吳鎮宣城令
崔欽令德之後良材間生縱風教之樂地出人倫之高
格卓絕映古清明在躬僉謀倬功不日而就然是役也
伊二公之力歟過客沉吟以稱嘆邦人聚舞以相賀僉
曰我趙公之亭也羣寮獻議請因謠頌以名之則必與
謝公北亭同不朽矣白以為謝公德不及後世亭不留

要衝無勿拜之言鮮登高之賦方之今日我則過矣敢
詢耆老而作頌曰

耿耿高亭趙公所營如鼇背突兀於太清如鵬翼開張
而欲行趙公之宇千載有覩必恭必敬爰遊爰處瞻而
思之罔敢大語趙公來翔有禮有章煌煌鏘鏘如文翁
之堂清風洋洋永世不忘

崇明寺佛頂尊勝陀羅尼幢頌

并序

共工不觸山媧皇不補天其鴻波汨汨流伯禹不治水

萬人其魚乎禮樂大壞仲尼不作王道其昏乎而有功
包陰陽力掩造化首出衆聖卓稱大雄彼三者之不足
徵矣粵有我西方金仙之垂範覺曠劫之大夢碎羣愚
之重昏寂然不動湛而常存使苦海靜滔天之波疑山
滅炎崐之火囊括天地置之清涼日月或墜神通自在
不其偉歟魯郡崇明寺南門佛頂尊勝陀羅尼石幢者
蓋此都之壯觀昔善住天子及千大天遊于園觀又與
天女遊戲受諸快樂即於夜分中聞有聲曰善住天子

七日滅後當生七反畜生之身於是如來授之吉祥真

經遂脫諸苦蓋之天徵

一作從

為大法印不可得而聞也

我唐高宗時有蜀賓桑門持入中土猶日藏大寶清園
虛空檀金淨彩人皆悅見所以山東文士舉國而崇之
時有萬商投珍士女雲會衆布蓄沓如陵琢文石於他
山聳高標於列肆鑱珉錯綵為鯨為螭天人海怪若叱
若語貝葉金言刊其上荷花水物形其隅良工草萊獻
技而去聖君垂拱南面穆清而居大明廣運無幽不燭

以天下所立茲幢多臨諸旗亭喧囂湫隘本非經行網
繞之所乃頒下明詔令移於寶坊吁百尺中標矗若雲
斷委翳苔蘚周流星霜俾龍象興嗟仰瞻無地良可嘆
也我太官廣武伯隴西李公先名琬奉詔書改為輔其
從政也肅而寬仁而惠五鎮方牧聲聞于天帝乃知剖
竹于魯魯道粲然可觀方將和陰陽於太階致君於堯
舜豈徒閑閣坐嘯鴻盤二千哉乃再崇厥功發揮象教
於是與長史盧公司馬李公等咸明明在公綽綽有裕

韜大國之寶鍾元精之和榮兼半刺道光列嶽才或大
而用小識無微而不通政其有經談豈更僕有律師道
宗心總羣妙量苞大千日何瑩而常明天不言而自運
識岸浪注玄機清發每口演金偈舌搖電光開關延敵
罕有當者由萬竅同號於一風衆流俱納於溟海若乃
嚴飾佛事規矩梵天法堂鬱以霧開香樓爰乎島峙皆
我公之締構也以天寶八年五月一日示滅大寺百城
號天四衆泣血焚香散花扶襯卧轍仙鶴數十飛鳴中

絕非至德動天深仁感物者其孰能與於此乎三綱等
皆論窮彌天惠湛清月傳千燈於智種了萬法於真空
不謀同心克樹聖跡太官李公乃命門於南垣廟通衢
曾盤舊規累構餘石壯士加勇力倅拔山纔擊鼓以雷
作拖鴻縻而電掣千人壯萬夫勢轉鹿盧於橫梁泯環
合而無際常六合之振動崛九霄之崢嶸非鬼神功曷
以臻此況其清景燭物香風動塵羣形所需積若都雪
梁星辰而增輝挂文字而不滅雖漢家金莖伏波銅柱

擬茲陋矣或日月圓滿芳檀散華清心諷持諸佛稱贊
夫如是亦可以從一天至一天開天宮之門見羣聖之
顏巍巍功德不可量也其錄事叅軍六曹英寮及十一
縣官屬有宏才碩德含香繡衣者皆列名碑陰此不具
載郡人都水使者宣道先生孫太沖得真人紫藥玉笈
之書能令太一神自成還丹以獻於帝帝服享萬壽與
天同休功成身退謝病而去不謂古之元通微妙之士
歟乃謂白曰昔王文考觀藝於魯騁雄辭於靈光陸佐

公知名在吳銘雙闕于盤石吾子盍可美盛德揚中和
恭承話言敢不惟命遂作頌曰

揭高幢兮表天宮嶷獨出兮凌星虹神縱縱兮來空仞
扶傾乎蒼穹西方大聖稱大雄橫絕苦海舟羣蒙陀羅
尼藏萬法宗善住天子獲厥功明明李君牧東魯再新
顏規扶衆苦如大雲王注法甫邦人清涼喜聚舞揚鴻
名兮振海浦銘豐碑兮昭萬古

當塗李宰君畫讚

天垂元精嶽降粹靈應期命世大賢乃生吐奇獻策敷
聞王庭帝用休之揚光泰清濫觴百里涵量八溟縉雲
飛聲當塗政成雅頌一變江山再榮舉邑抃舞式圖丹
青眉秀華蓋目朗明星鶴矯閭風麟騰玉京若揭日月
昭然運行窮神闡化永世作程

金陵名僧顯公粉圖慈親讚

神妙不死惜生此身託禮明淑而稱厥親粉為造化筆
寫天真貌古松雪心空世塵文伯之母可以為隣

李居士讚

至人之心如鏡中影揮斤萬變動不離靜彼質我斤揮
風是騁了物無二皆為匠郢吾族賢老名喧寫真貌圖
粉繪生為垢塵從白得衰與天為隣默然不滅長存此
身

安吉崔少府翰畫讚

齊表巨海吳嗟大風崔為令族出自太公克生奇才骨
秀神聰炳若秋月騫然雲鴻爰圖伊人奪妙真宰卓立

欲語謂行而在清晨一觀爽氣十倍張之座隅仰止光
彩

宣城吳錄事畫讚

大名之家昭彰日月生此髦士風霜秀骨圖真象賢傳
容寫髮束帶嶽立如朝天闕巖巖兮謂四方之削成澹
澹兮申五湖之澄明武庫肅穆辭峰崢嶸大辯若納大
音希聲默然不語終為國楨

壁畫蒼鷹讚

識主人

突兀枯樹傍無寸枝上有蒼鷹獨立若秋胡之攢眉凝
金天之殺氣凜粉壁之雄姿背銛劒戟爪握刀錐羣賓
失席以睟眙未悟丹青之所為吾嘗恐出戶牖以飛去
何意終年而在斯

師猛讚

張公之堂華壁照雪師猛在圖雄姿奮發森竦眉目颯
灑毛骨鋸牙銜雙鈎爪抱月掣蹲明以震怒謂大厦之
峴岼永觀厥容神駭不歇

舊本無永觀厥容
神駭不歇二句

羽林范將軍畫讚

羽林列衛壁壘南垣四十五里光輝至尊范公拜將遙
承主恩位寵虎臣封傳鴈門瞻天蹈舞踊躍精魂逐逐
鶚視昂昂鴻騫心豪祖逖氣爽劉琨名震大國威揚列
藩麟閣之階粉圖華軒胡兵百萬橫行縱吞爪牙帝室
功業長存

金銀泥畫西方淨土變相讚

并序

我聞金天之西日沒之所去中華十萬億刹有極樂世

界焉彼國之佛身長六十萬億恒沙由旬眉間白毫向
右宛轉如五須彌山目光清白若四海水端坐說法湛
然常存沼明金沙岸列珍樹欄楯彌覆羅網周張車渠
瑠璃為樓殿之飾玻黎碼碯耀階砌之榮皆諸佛所證
無虛言者金銀泥畫西方淨土變相蓋馮翊郡秦夫人
奉為亡夫湖州刺史韋公之所建也夫人蘊冰玉之清
敷聖善之訓以伉儷大義希拯拔幽塗父子恩深用重
修於景福誓捨珍物購求名工圖金創端繪銀設像八

法功德波動青蓮之池七寶香花光映黃金之地清風
所拂如生五音百千妙樂咸疑動作若已發願未及發
願若已當生未及當生精念七日必生其國功德罔極
酌而難名讚曰

向西日沒處遙瞻大悲顏月淨四海水身光紫金山勤
念必往生是故稱極樂珠網珍寶樹天花散香閣圖畫
了在眼願託彼道場以此功德海冥祐為舟梁八十一
劫罪如風掃輕霜庶觀無量壽長願玉毫光

江寧楊利物畫讚

太華高嶽三峰倚天洪波經海百代生賢為變為龍廓
土濟川趙城開國玉樹凌煙筆鼓元化形分自然明珠
獨轉秋月孤懸作宰作程摧剛挫堅德合窈冥聲播蘭
荃鴻漸麟閣英圖可傳

金鄉薛少府廳畫鶴讚

高堂閒軒兮雖聽訟而不擾圖蓬山之奇禽想瀛海之
縹緲紫頂煙艷丹眸星皎昂昂佇眙

一作
欲飛

霍若驚鷲矯形

留座隔勢出天表謂長鳴

一作
唳

於風霄終寂立於露曉

凝翫益古俯察逾妍舞疑傾市聽似聞絃儻感至精以
神變可弄影而浮煙

誌公畫讚

水中之月了不可取虛空其心寥廓無主錦幪烏爪獨

行絕侶刀齊尺梁扇迷陳語丹青聖容何往何所

一作
去往

何所

琴讚

嶧陽孤桐石聳天骨根老冰泉葉枯霜月斲為綠綺徽
聲繁發秋風入松萬古奇絕

朱虛侯讚

嬴氏穢德金精摧傷秦鹿克獲漢風飛揚赤龍登天白
日昇光陰虹賊虐諸呂擾攘朱虛來歸會酌高堂雄劒
奮擊太后震惶爰鋤產祿大運乃昌功冠帝室于今不
亡

觀飲飛斬蛟龍圖讚

飲飛斬長蛟遺圖畫中見登舟既虎嘯激水方龍戰驚
波動連山拔劒曳雷電鱗摧白刃下血染滄江變感此
壯古人千秋若對面

地藏菩薩讚

并序

大雄掩照日月崩落惟佛智慧大而先生死雪賴假普
慈力能救無邊苦獨出曠劫導開橫流則地藏菩薩為
當仁矣弟子扶風寶滔少以英氣爽邁結交王侯清風
豪俠極樂生疾乃得惠劒於真宰湛本心於虛空願圖

聖容以祈景福庶冥力憑助而厥苦有瘳爰命小才式
讚其事讚曰

本心若虛空清淨無一物焚蕩淫怒癡圓寂了見佛五
綵圖聖像悟真非妄傳掃雪萬病盡爽然清涼天讚此
功德海永為曠代宣

魯郡葉和尚讚

海英嶽靈誕彼開士了身皆空觀月在水如薪傳火朗
徹生死如雲開天廓然萬里寂滅為樂江海而閒逆旅

形內虛舟世間邈彼崑閭誰云可攀

李太白集分類補註卷二十九

欽定四庫全書

李太白集分類補註卷三十

宋 楊齊賢 集註

元 蕭士贇 補註

銘 二首 碑 五首 文 二首 總九首

化城寺大鐘銘 并序

噫天以震雷鼓羣動佛以鴻鐘驚大夢而能發揮沉潛
開覺茫蠢則鐘之取象其義博哉夫揚音大千所以清

真心警俗慮協響廣樂所以達元氣彰天聲銘勲皇宮
所以旌豐功昭茂德莫不配美金鼎增輝寶坊仍事作
制豈徒然也粵有唐宣城郡當塗縣化城寺大鐘者量
函千盈蓋邑宰李公之所勗也公名有則系玄元之英
蕤茂列聖之天枝生于公族貴而秀出少蘊才畧壯而
有成西逾流沙立功絕域帝疇乎厥庸始學古從政歷
宰潔白聲聞于天天書褒榮輝之簡牘稽首三復子孫
其傳天寶之初鳴琴此邦不言而治日計之無近功歲

計之有大利物不知化潛臻小康神明其道越不可尚
方入于禪關覩天宮崢嶸聞鐘聲瑣屑乃謂諸龍象曰
盍不建夫法鼓樹之層臺使羣聾六時有所歸仰不亦
美乎於是發一言以先覺舉百里而咸應秋毫不挫人
多子來銅崇朝而山積工不日而雲會乃採鳧氏撰鳴
鐘火天地之爐扇陰陽之炭回祿奮怒飛廉震驚金精
轉渚以融熠銅液星熒而燿燦光噴日道氣敵天維紅
雲點於太清紫煙矗於遙海烜赫宇宙功侔鬼神瑩而

察之吁駭人也爾其龍質炳發虎形躩踞縻金索以上
絙懸寶樓而迭擊傍振萬壑高聞九天聲動山以隱隱
響奔雷而闐闐赦湯鑊於幽途息劔輪於苦海景福盼
蠻被于人天非李公好謀而成弘濟羣有孰能與於此
乎丞尉等並衣冠之龜龍人物之標準大雅君子同僚
盡心聞善賈勇贊成厥美寺主昇朝聞心古容英骨秀
氣洒落毫素謙柔笑言海受水而皆納鏡無形而不燭
直道妙用乃如是言常虛懷忘情潔已利物是人行空

寂不動見如來有若上座靈隱都維那則舒名僧曰暉
蘊虛常因調護賢哉六開士普聞八萬法深入禪惠精
修律義將博我以文章求我以述作功德大海酌而難
名遂與六曹豪吏姑熟賢老乃緇乃黃鳬趨梵庭請揚
宰君之鴻美白昔忝侍從備于辭臣恭承德音敢闕清
風之頌其辭曰

雄雄鴻鐘砰隱天雷鼓霆擊驚大千合號烜赫聲無邊
摧憚魑魅招靈仙傍極六道極九泉劒輪輟苦期息肩

湯鑊猛火停熾燃愷悌賢宰人父母興功利物信可久
德方金鐘永不朽

天門山銘

梁山博望關局楚濱夾據洪流實為吳津兩坐錯落如
鯨張鱗惟海有若惟川有神牛渚怪物目圍車輪光射
島嶼氣凌星辰卷沙揚濤溺馬殺人國泰呈瑞時訛返
珍開則九江納錫閉則五嶽飛塵天險之地無德匪親

溧陽瀨水貞義女碑銘

并序

皇唐葉有六聖再造八極鏡照萬方幽明咸熙天秩有
禮自太古及今君君臣臣烈士貞女采其名節尤彰可
激清頽俗者皆掃地而祠之蘭蒸椒漿歲祀罔缺而茲
邑貞義女光靈翳然埋冥古遠琬琰不刻豈前修博達
者為邦之意乎貞義女者潯陽黃山里史氏之女也以
家潯陽史闕書之歲三十弗移天于人清英潔白事母
純孝手柔荑而不龜身擊漂以自業當楚平王時平王
虐忠助讒苛虐厥政芟於尚斬於奢血流于朝赤族伍

氏怨毒於人何其深哉子胥始東奔勾吳月涉星遁或
七日不火傷弓於飛逼迫於昭關匍匐於瀨渚捨車而
徒告窮此女目色以臆授之壺漿全人自沉形與口滅
卓絕千古聲凌浮雲激節必報之讐雪誠無疑之地難
乎哉借如曹娥潛波理貫於孝道聶姊殞肆槩動於天
倫魯姑棄子以却三軍之衆漂母進飯沒受千金之恩
方之於此彼或易爾卒使伍君開張闔閭傾蕩鄢郢吳
師鞭屍於楚國中胥泣血於秦庭我亡爾存亦各壯志

張英風於古今雪大憤於天地微此女之力雖有為之
士焉能咆哮烜赫施於後世也望其溺所愴然低徊而
不能去每風號吳天月苦荆水響像如在精魂可悲惜
其投金有泉而刻石無主哀哉邑宰滎陽鄭公名晏家
康成之學世子產之才琴清心閒百里大化有若主簿
扶風竇嘉賓縣尉廣平宋陟丹陽李濟南朝陳然清河
張昭皆有卿才霸略同事相協緬紀英淑勒名道周雖
陵頽海竭文或不死其辭曰

粲粲貞女孤生寒門上無所天下報母恩春風三十花
落無言乃如之人激漂清源碧流素手縈彼潺湲求思
不可秉節而存伍胥東奔乞食於此女分壺漿減口而
死聲動列國義形壯士入郢鞭屍還吳雪恥投金瀨汜
報德稱美明明千秋如月在水

天長節使鄂州刺史韋公德政碑

并序

太虛既張惟天之長所以白帝真人當高秋八月五日
降西方之金精採天長為名將傳之無窮紀聖誕之節

也我高祖創業太宗成之三后繼統王猷如一大盜間
起開元中興力倍造化功包天地不然何能遏犧農之
頽波返淳朴於太古雖軒后至道猶聞蚩尤之師今網
漏吞舟而胡夷起於轂下先天文武孝感皇帝越在明
兩總戎扶風正帝車於北斗拯橫流於鯨口迴日轡於
西山拂蒙塵於帝顏呼吸而收兩京烜赫而安六合歷
列辟而罕匹顧將來而無儔太陽重輪合耀並出宇宙
翕變草木增榮一麾而靜妖氛成功不處五讓而傳劒

聖德冠樂推於戲昔堯及舜禹皆無聖子審歷數去已
終大寶假人飾讓以成千載之美未若以文明鴻業受
之元良與天同休相統億祀則我唐至公而無私越三
聖而殊軌騰萬人之喜氣爛八極之祥雲上皇思汾陽
而高蹈解負重於吾君能事斯畢與人更始乃展祀郊
廟望秩山川方掩骼於河洛弔人於幽燕但誅元兇不
問小罪噫大塊之氣歌炎漢之風雲滂洋雨汪濊滌渥
澤除瑕類削平國步改號乾元至矣哉其雄圖景命有

如此者我邦伯韋公大彭之洪裔扶楊之貴族雄略邁
古高文變風運當一賢才堪三事歷職剖劇能聲旁流
振繡而白筆橫冠分符而彤襜入境曩者永王以天人
授鉞東巡無名利劒承喉以脅從壯心堅守而不動房
陵之俗安於太山休奔列郡去若始至帝召岐下深嘉
直誠移鎮夏口救時艱也慎厥職康乃人減兵歸農除
害息暴大水滅郭洪霖注川人見憂於魚鼈岸不辨於
牛馬公乃抗辭正色言于城隍曰若三日雨不歇吾當

伐喬木焚清祠精心感動其應如響無何中使銜命徧
祈名山廣徵牲牢驟欲致祭公又盱衡而稱曰今主上
明聖懷於百靈此淫昏之鬼不載祀典若煩國禮是荒
巫風其秉心達識皆此類也物不知化如登春臺有若
江夏縣令薛公揖四豪之風當百里之寄幹蠱有立舍
章可貞遵之典禮恤疲於和樂政其成也臻於小康中
京重覩於漢儀列郡還聞於舜樂選鄂之勝帳于東門
乃登豳歌擊土鼓祀蓐收迎田祖招搖迴而大火乃落

闔闔啟而涼風始歸笙竽和籥之音象星辰而迭奏吳
楚巴渝之曲各土風而備陳禮容有穆簪笏列序羅衣
蛾眉立乎玳瑁之上班劍虎士森乎翠幕之前千變百
戲分曹賈勇藺子跳劍迭躍流星之輝都盧尋橦倒掛
浮雲之影百川繞郡落天鏡於江城四山入牖照霜空
之海色獻觴醉於晚景舞袖紛於廣庭鶴髮之叟鴈序
而進曰恭聞天子無戲言恐轉公以大用老父不畏死
願留公以上聞悅坐棠而飡風庶刻石以賓美白觀樂

入楚聞韶在齊採諸行謠遂作頌曰

爽朗太白雄光下射崢嶸金天華嶽旁連降精騰氣赫
矣昭然誕聖五日垂休萬年孽胡挺災大人有作雷霆
發揚攬槍乃落九服交泰五雲縈薄掃雪屯蒙洗清寥
廓軒后訪道來登蛾眉上皇西去異代同時六龍轉駕
兩曜迴規重遭唐主更覩漢儀肅肅韋公大邦之翰秀
骨嶽立英謀電斷宣風樹聲遠威逆亂不長不極樂奏
爭觀九劔揮霍魚龍屈盤東迴舞袖西笑長安頌聲載

路豐碑是刊

比干碑

并序

太宗文皇帝既一海內明君臣之義貞觀十九年征島夷師次殷墟乃詔贈少師比干為太師謚曰忠烈公遣大臣持節弔祭申命郡縣封墓葺祠置守冢以少牢時享著於甲令刻於金石故比干之忠益彰臣子得述其志昔商王受毒痛於四海悖于三正肆厥淫虐下罔敢諍於是微子去之箕子囚之而公獨死之非夫捐生之

難處死之難故不可死而死是輕其生非孝也可死而不死是重其死非忠也王曰叔父親其至焉國之元臣位莫崇焉親不可以觀其危昵不可以忘其祖則我臣之業將墜於泉商王之命將絕于天整扶其顛遂諫而死剖心非痛亡殷為痛公之忠烈其若是焉故能獨立危邦橫抗興運周武以三分之業有諸侯之師實其十亂之謀總其一心之衆當公之存也乃戢彼西土及公之喪也乃觀乎孟津公存而殷存公喪而殷喪興亡相

繫豈不重歟且聖人立教懲惡勸善而已矣人倫大統
父子君臣而已矣少師存則垂其統歿則垂其教奮乎
千古之上行乎百王之末俾夫淫者懼佞者慙義者思
忠者勸其為戒也不亦大哉而夫子稱殷有三仁是豈
無微旨又嘗聞之曰存其身存其宗亦仁矣存其名一作
身存其祀亦仁矣亡其身圖其國亦仁矣若進死者退
生者狂狷之士將奔走之褒生者貶死者宴安之人將
寘力焉故同歸諸仁各順其志殊塗而一揆異行而齊

致俾後人優柔而自得焉蓋春秋微婉之義必將建皇極立彝倫闢在三之門垂不二之訓以明知于世則夫人臣者既移孝於親而致之於君焉有聞親失而不諍親危而不救從容安地而自得甚哉不然矣夫孝於其親人之親皆欲其子忠於其主人之主皆欲其臣故歷代帝王皆欲精顯周武下車而封其墓魏武南遷而創其祠我太宗有天下裡百神盛其禮追贈太師謚曰忠烈申命郡縣封墓葺祠置守家五家以少牢時享著於

甲令刻于金石於戲哀傷列辟主君封德正與神明秩
視郡王身滅而榮益大世絕而祀愈長然後知忠烈之
道激天感人深矣天寶十祀余尉于衛拜首祠堂魄感
精動而廟在鄰邑官非式閭斷石銘表以志丕烈銘曰
縻軀非仁蹈難非智死於其死然後為義忠無二軀烈
有餘氣正直聰明至今猛視咨爾來代為臣不易

武昌宰韓君去思頌碑

并序

仲尼大聖也宰中都而四方取則子賤大賢也宰單父

人至于今而思之乃知德之休明不在位之高下其或繼之者得非韓君乎君名仲卿南陽人也昔延陵知晉國之政必分於韓獻子雖不能遏屠岸之誅存孤嗣趙太史公稱天下陰德也其賢才羅生列侯十世不亦宜哉七代祖茂後魏尚書令安定王五代祖鈞金部尚書曾祖駿銀青光祿大夫雅州刺史祖泰曹州司馬考睿素朝散大夫桂州都督府長史分茅納言剖符佐郡奕葉明德休有烈光君乃長史之元子也妣出自錢氏及

長史即世夫人早孀弘聖善之規成名四子文伯孟軻
二母之儔歟少卿當塗縣丞感慨重諾死節於義雲卿
文章冠世拜監察御史朝廷呼為子房紳卿尉高郵才
名振耀幼負美譽君自潞州銅鞮尉調補武昌令未下
車人懼之既下車人悅之惠如春風三月大化姦吏束
手豪宗側目有黷王者三江之巨橫白額且去清琴高
張兼操刀永興二邑同化時鑿齒磨牙而兩京宋城易
子而炊骨吳楚轉輸蒼生熬然而此邦晏如襁負雲集

居未二載戶口三倍其初銅鐵等珍未擇地而出大冶
鼓鑄如天降神既烹且爍數盈萬億公私共賴之官絕
請託之求吏無絲毫之犯本道採訪大使皇甫公旣聞
而賢之擢佐輜軒多所弘益尚書右丞崔公禹稱之於
朝相國崔公渙特奏授鄱陽令兼攝數縣所謂投刃而
皆虛為其政而則理成去若始至人多懷恩新宰王公
名庭璘嚴然太華浼然洪河含章可貞幹蠱有立接武
比德絃歌連聲服美前政聞諸耆老與邑中賢者胡思

秦一十五人及諸寮吏式歌且舞願揚韓公之遺美白
採謠刻石而作頌曰

峨峨楚山浩浩漢水黃金之車大吳天子武昌鼎據實
為帝里時艷世訛薄俗如燬韓君作宰撫茲遺人滂汪
王澤猶鴻得春和風潛暢惠化如神刻石萬古永思清
塵

虞城縣令李公去思頌碑

并序

王者立國君人聚散六合咸土以百里雷其威聲革其

俗而風之漁其人而涵之其猶衆鮮洋洋樂化在水波而動之則憂賴尾之刺作焉徐而清之則安頌首之頌興焉苟非大賢孰可育物而能光昭絃歌卓立振古則有虞城宰公焉公名錫字元勲隴西成紀人也高祖楷隋上大將軍繇益原三州刺史封汝陽公曾祖騰雲皇朝廣茂二州都督廣武伯祖立節起家韓王府記室叅軍襲廣武伯父浦郢海淄唐陳五州刺史魯郡都督廣平太守襲廣武伯皆納忠王庭名鏤鐘鼎侯伯繼跡故

可畧而言焉公即廣武伯之元子也年十九拜北海壽
光尉心不挂細務口不言人非羣吏罕測望風敬憚秩
滿轉右武衛倉曹叅軍次任趙郡昭應縣令奉詔修建
初啟運二陵總徒五郡支用三萬貫舉築雷野不鞭一
人功成餘八千貫其幹能之聲大振乎齊趙矣時名卿
巡按陵有黃赤氣上衝太微散為慶雲數千處蓋精勤
動天地也如此因粉圖奏名編入國史天寶四載拜虞
城令而天章寵榮俾金玉王度烱若七耀昭回堂隅於

戲敬之哉按其善政作訓以理其俗魯而木舒而徐急則狼戾緩則鳥散公酌以鈞道和之琴心於是安四人敷五教處必糲食行惟單車觀其約而吏儉仰其敬而俗讓激直士之素節揚廉夫之清波三月政成隣封取則因行春見枯骸於路隅惻然疚懷出俸而葬由是百里掩骼四封歸仁有居喪行號城市者習以成俗公勗之親隣厄以凶事而鰥寡惇獨衆所賴焉可謂變其頽風永錫爾類先時邑中有聚黨橫猾者實惟二耿之族

幾百家焉公訓為純人易其里曰大忠正之里北境黎
丘之古鬼焉或醉父以刃其子自公到職茂間為災官
宅舊井水清而味苦公下車嘗之莞爾而笑曰既苦且
清足以符吾志也遂汲用不改變為甘泉蠡丘館東有
三柳焉公往來憩之飲水則去行路勿翦比于甘棠鄉
人田樹而書頌四十有六篇惟公志氣塞乎天地德音
發乎聲容縞乎若寒崖之霜湛乎若清川之月彈惡雪
善速若箭飛尤能筆工新文口吐雅論天下美士多從

之遊非汝陽三公二伯之積德則何以生此邑之賢老
劉楚瓌等乃相謂曰我李公以神明之化大賴于虞人
虞人陶然歌咏其德官則敬去則思山川鬼神猶懷之
況于人乎乃咨羣寮興去思之頌縣丞王彥暹員外丞
魏陟主簿李詵縣尉李向趙濟盧榮等同德比義好謀
而成相與採其瓌蹤茂行俾刻石篆美庶清風令名奮
乎百世之上其詞曰

激揚之水兮白石有鑿李公之來兮雪虞人之惡厥德

孔昭折獄既清五教大行殷雲雷之聲既父其父又子
其子春之以風化成草靡乃影我崗乃雨我田陽無驕
僭四載有年人戴公之賢猶百里之天棄金往矣茫如
墜川哀喪惠博掩骼仁深苦井變甘亮人易心三柳勿
翦永思清音

為竇氏小師祭璿和尚文


年月日某謹以齋蔬之奠敢昭告於和尚之靈伏惟和
尚降靈自天依化遊世角立獨出巍然生知鳳凰開九

苞之翼豫章橫萬頃之陂始傳燈而納照因落髮以從
師邁龍象以蹴踏為天人之羽儀紹釋風於西域迴佛
日於東維若大塊之噫氣鼓和風而一吹熱惱清灑道
芽榮滋走吳楚以宗仰將掃地而歸之嗚呼來無所從
去復何適水還火歸蕭散本宅寶舟輟棹禪月掩魄痛
一往而無蹤愴霜林之變白某早承訓誨偏荷恩慈忝
食風於法侶旋落陰於禪枝號無輟響泣有餘悲手撰
茗藥精誠嚴思冀神道之昭格庶明靈而饗之

為宋中丞祭九江文

謹以三牲之奠敬祭於長源公之靈惟神包括乾坤平
準天地劃三峽以中斷疏九道以爭奔網紀南維朝宗
東海牲玉有禮祀典無虧今萬乘蒙塵五陵慘黯蒼生
悉為白骨赤血流於紫宮宇宙倒懸攬槍未滅含識結
憤思剪元兇而沉叅列雄藩各當重寄遵奉王命大舉
天兵照海色於旌旗肅軍威於原野而洪濤渤涌狂飈
振驚惟神使陽侯卷波義和奉命樓船先濟士馬無虞

掃妖孽於幽燕斬鯨鯢於河洛惟神祐我降休於民敬
陳精誠庶垂歆饗



李太白集分類補註卷三十